



RHONDDA CYNON TAF

At Rhieni/Cynhalwyr
sylw:

Gofynnwch am:
Please Ask For:
Rhif Est:
Telephone N°:
Ffacs:
Fax:
E-bost:
E-Mail:
Cylchlythyr:
Circular:

Gaynor Davies
01443 744001

Fy Nghyf: GD/TM
My Ref:

Eich Cyf:
Your Ref:

Dyddiad: 15 Gorffennaf 2020
Date:

Annwyl Rieni/Cynhalwyr (Gofalwyr),

Dyma roi gwybod i chi am sefyllfa ddiweddaraf trefniadau 'Yn ôl i'r Ysgol' ym mis Medi ar gyfer ysgolion Rhondda Cynon Taf. Ar 9 Gorffennaf 2020, cadarnhaodd Kirsty Williams, y Gweinidog Addysg yng Nghymru, y bydd pob disgybl yn gallu dychwelyd i'r ysgol ym mis Medi. Yr wythnos ddiwethaf, rhoddodd Grŵp Cynghori Technegol Cymru, sy'n darparu cyngor gwyddonol a thechnegol i'r Llywodraeth yn ystod argyfyngau, argymhelliad i'r Gweinidog y dylai ysgolion "drefnu i agor ym mis Medi gyda 100% o ddisgyblion yn mynychu ar y safle, a hynny'n amodol ar lefel COVID-19 yn y gymuned yn lleihau'n barhaus ac yn gyson."

Cyhoeddodd y Gweinidog hefyd:

- Bydd ysgolion yn dychwelyd i'w capasiti llawn, gyda dim ond ychydig o fesurau cadw pellter cymdeithasol mewn grwpiau cyswllt.
- Pan fydd ysgol yn gweithredu ar gapasiti llawn, dylai grŵp cyswllt gynnwys tua 30 o blant. Bydd rhywfaint o gymysgu uniongyrchol neu anuniongyrchol rhwng plant mewn grwpiau cyswllt gwahanol hefyd yn anochel, e.e. ar gludiant i'r ysgol, wrth dderbyn addysg arbenigol neu oherwydd cyfyngiadau staffio.
- Dylai mesurau cadw pellter cymdeithasol i oedolion barhau, yn unol â'r rheoliadau a'r canllawiau.
- Bydd yn ofynnol i ysgolion leihau'r risg o drosglwyddo'r feirws drwy gymryd mesurau lliniaru eraill gan ddefnyddio'r hierarchaeth o fesurau rheoli risg.
- Dylai pob ysgol barhau i "ddiogelu'i hun rhag COVID-19", a hynny ar ôl cynnal asesiadau risg. Dylai ysgolion liniaru'r risgiau yma drwy gyfuniad o fesurau rheoli fel sicrhau hylendid dwylo ac arwynebau, systemau unffordd ac ati.
- Os bydd systemau rhybuddion cynnar yn nodi gwybodaeth am ddigwyddiad neu achos lleol, yna dylai ysgolion cyfagos roi mesurau cyfyngu priodol ar waith.
- Bydd pob ysgol yn derbyn cyflenwad o becynnau profi gartref.

Tŷ Trevithick
Abercynon, Aberpennar, CF45 4UQ
Abercynon, Mountain Ash, CF45 4UQ

Ffôn/Tel: 01443 744000
Ffacs/Fax: 01443 744024

Gaynor Davies
Cyfarwyddwr Addysg a Gwasanaethau Cynhwysiant | Director of Education and Inclusion Services

Dewiswch iaith a diwyg eich dogfen | Available in alternative formats and languages

Croesawn ohebu yn Gymraeg a fydd gohebu yn y Gymraeg ddim yn arwain at oedi. Rhowch wybod inni beth yw'ch dewis iaith e.e Cymraeg neu'n ddwyieithog.
We welcome correspondence in Welsh and corresponding with us in Welsh will not lead to a delay. Let us know your language choice if Welsh or bilingual.



MAE EICH DATA O BWYS www.rctcbc.gov.uk/diogeludata
YOUR DATA MATTERS www.rctcbc.gov.uk/dataprotection



Cadarnhaodd y Gweinidog y bydd tymor yr hydref yn dechrau ar 1 Medi 2020. Bydd ein disgyblion yn dychwelyd i'r ysgol ar 3 Medi. Erbyn hyn bydd ysgolion wedi cael cyfnod o baratoi a chynllunio ar gyfer asesu risgiau a rhoi mesurau rheoli ar waith. Byddan nhw hefyd wedi addasu prosesau a gweithdrefnau ar gyfer cadw disgyblion a staff yn ddiogel wrth i bawb ddychwelyd i'r ysgol. O 3 Medi 2020, bydd disgyblion yn mynd yn ôl i'r ysgol yn raddol dros gyfnod o wythnos. Bydd holl ddisgyblion Rhondda Cynon Taf yn ôl yn yr ysgol erbyn 10 Medi 2020.

Bydd modd bod yn hyblyg ac rydyn ni'n cydnabod efallai y bydd ysgolion am ganolbwyntio ar grwpiau blwyddyn â blaenoriaeth, e.e. y rheiny sy'n mynychu dosbarthiadau cynnal dysgu sy'n gysylltiedig ag ysgolion prif ffrwd. O ran ysgolion cynradd, gall grwpiau â blaenoriaeth hefyd gynnwys disgyblion yn y blynyddoedd cynnar neu flwyddyn 6. O ran ysgolion uwchradd, gall hyn olygu disgyblion sy'n newydd i'r ysgol uwchradd neu sydd i fod i sefyll arholiadau yr haf nesaf. I gael canllawiau pellach, ewch i: <https://llyw.cymru/canllawiau-gweithredol-ar-gyfer-ysgolion-leoliadau-o-dymor-yr-hydref-covid-19>

Yn ffodus, mae nifer yr achosion o COVID-19 ledled y wlad wedi gostwng, ac mae'r camau rydych chi wedi'u cymryd wedi cyfrannu'n sylweddol at hyn. Rydyn ni hefyd yn gwybod bod rhai teuluoedd a phlant wedi'i chael hi'n anodd ymdopi â'r cyfyngiadau. Bydd colled a galar wedi effeithio'n bersonol ar rai, bydd eraill wedi wynebu heriau ariannol ac mae pawb wedi profi newid ac ansicrwydd. Yn ystod y cam nesaf yma, gall ysgolion agor gyda'r ddarpariaeth ddysgu fwyaf posibl, gan darfu cyn lleied â phosibl ar ein pobl ifainc. Bydd rhai heriau wrth ail-agor pob ysgol i holl ddisgyblion y Sir, gan fod pob ysgol yn wahanol i'w gilydd. Serch hynny, mae carfanau rheoli ysgolion a'r Awdurdod Lleol yn gweithio ar y cyd i sefydlu'r dull gorau i bob ysgol ac rydyn ni'n falch iawn o groesawu'r holl ddisgyblion yn ôl i'n hysgolion ledled y Fwrdeistref Sirol. Mae'r ffaith bod cymaint o hapusrwydd i'w weld ar wynebau ein disgyblion yn ein hysgolion yn ystod yr wythnosau diwethaf yn profi cymaint maen nhw wedi mwynhau bod yn ôl yng nghwmni'u ffrindiau a staff yr ysgol, a dysgu yn eu hysgolion yn y gymuned.

Rydyn ni'n gwybod y byddwch chi'n teimlo'n ansicr a bod gyda chi lawer o gwestiynau am amgylchiadau unigol eich plentyn. Bydd dolen i Gwestiynau Cyffredin ar gael ar wefan y Cyngor maes o law. Ein gobaith yw y bydd yn ateb pob ymholiad posibl. Bydd modd dod o hyd i'r Cwestiynau Cyffredin o ddydd lau 16 Gorffennaf yma:

www.rctcbc.gov.uk/CwestiynauCyffredinDychwelydirYsgol

Ddylai disgyblion sydd wedi derbyn llythyr gwarchod oherwydd eu bod yn agored i niwed o safbwynt meddygol, neu sy'n byw yn yr un tŷ â rhywun sydd wedi derbyn llythyr gwarchod, ddim dychwelyd i'r ysgol (yn seiliedig ar gyngor meddygol cyfredol). Serch hynny, caiff y 'categori gwarchod' ei adolygu yng nghanol mis Awst 2020 felly mae'n bosibl bydd y sefyllfa'n newid. Os bydd y sefyllfa'n newid, bydd cyfarwyddyd pellach yn cael ei rannu â holl rieni a chynhalwyr. Ar hyn o bryd, y disgwyl yw bydd y plant yma'n parhau i fanteisio ar gyfleoedd dysgu digidol a chymorth gan yr ysgol o bell.

Bydd carfanau rheoli ysgolion yn cynnal asesiadau risg i'w helpu i nodi'r dull sydd orau ar gyfer ysgol eich plentyn. Bydd pob ysgol yn gweithredu cynlluniau a all fod yn wahanol i'w gilydd ledled yr Awdurdod Lleol, gyda gwahanol grwpiau blwyddyn yn cael eu blaenoriaethu o ran dychwelyd i'r ysgol. Bydd pob ysgol yn cysylltu â rhieni a chynhalwyr i rannu'r wybodaeth yma cyn gwyliau'r haf.

Bydd ysgolion yn gweithio'n wahanol iawn, o leiaf am ran gynta'r hanner tymor. Bydd dosbarthiadau a grwpiau blwyddyn yn cael eu rhoi mewn grwpiau cyswllt a bydd cyswllt cymdeithasol rhwng grwpiau'n cael ei leihau cymaint â phosibl. Bydd ysgolion yn gweithredu arferion golchi dwylo/defnydd o hylif glanhau dwylo a chadw pellter cymdeithasol rheolaidd, a bydd grwpiau'n cael gwahanol amseroedd egwyl/cinio a dechrau/gorffen yr ysgol. Byddwn ni'n gweithio'n agos gydag ysgolion a llywodraethwyr i geisio sicrhau cysondeb o ran egwyddorion a dull gweithredu ledled y Fwrdeistref Sirol.

Rydyn ni'n aros am ragor o fanylion am cludiant rhwng y catref a'r ysgol ac mae disgwyl i Lywodraeth Cymru gyhoeddi canllawiau hefyd. Dyma ofyn i rieni a chynhalwyr helpu i esbonio i ddisgyblion bwysigrwydd mesurau cadw pellter cymdeithasol ac arferion effeithiol o ran golchi dwylo a'r hyn i'w wneud wrth disian neu beswch er mwyn helpu'r feirws rhag lledaenu, gan bydd y rhain yn chwarae rhan allweddol wrth gadw pawb yn ddiogel.

Mae Cyngor Rhondda Cynon Taf yn parhau i weithio'n agos gyda'n holl ysgolion sydd wedi gwneud gwaith gwych yn darparu gofal plant drwy gydol y tymor, gan gynnwys yn ystod gwyliau ysgol a phenwythnosau o dan amodau anodd iawn. Maen nhw hefyd wedi darparu gwersi digidol a chymorth lles i'ch plentyn/plant, yn ogystal â phroses dychwelyd i'r ysgol yn raddol yn ystod y 3 wythnos diwethaf, ac rydyn ni'n gobeithio bod hyn wedi gwneud gwahaniaeth yn ystod y pandemig. Hoffwn i hefyd ddiolch i chi am y cyfleoedd dysgu gartref gwerthfawr rydych wedi'u darparu i'ch plentyn/plant dros y misoedd diwethaf ac am wneud gwahaniaeth cadarnhaol. Rydyn ni'n gwerthfawrogi'r gwaith yma'n fawr.

Os yw eich plentyn yn disgwyl canlyniadau arholiadau'r haf yma, bydd modd eu casglu o'r ysgol ar y dyddiad dynodedig. Yn naturiol, bydd rhai newidiadau sylweddol i'r gweithdrefnau arferol. Bydd y profiad yma'n wahanol iawn eleni a bydd yn ofynnol i ysgolion ganiatáu i grwpiau bach o ddisgyblion yn unig fynd i mewn i adeilad yr ysgol i gasglu eu canlyniadau ar adegau penodol, a hynny er mwyn rheoli llif unigolion a chynnal mesurau cadw pellter cymdeithasol. Fydd disgyblion hefyd ddim yn cael ymgynnull mewn grwpiau mawr y tu allan i'r ysgol oherwydd y risgiau posibl y mae hyn yn debygol o'u peri. Dyma gydnabod y bydd hyn yn anodd gan fod y diwrnod yn un emosiynol, ond mae'n ofyniad hanfodol er mwyn cadw pawb yn ddiogel. Bydd ysgolion yn darparu cyfleoedd wedi hyn i ddisgyblion a'u teuluoedd os oes angen cymorth ac arweiniad arnyn nhw. I helpu teuluoedd gydag unrhyw ymholiadau am newidiadau i'r arholiadau, mae dogfen Cwestiynau Cyffredin ar gael er gwybodaeth. Mae modd dod o hyd i'r Cwestiynau Cyffredin yma: www.rctcbc.gov.uk a chlicio ar adran 'Newyddion Ysgolion' ar y dudalen hafan.

Bydd Pennaeth ysgol eich plentyn yn rhoi gwybod i chi am drefniadau tymor yr hydref yn y man, a/neu drefniadau diwrnod canlyniadau arholiadau os yw'n berthnasol. Os bydd y Gyfarwyddiaeth Addysg yn diweddarar unrhyw wybodaeth pan fydd yr ysgol ar gau, bydd y Cyngor yn cyhoeddi'r newyddion yma ar ei wefan. Yn y cyfamser, dyma obeithio y cewch chi haf hyfryd.

Diolch ymlaen llaw am barhau i roi'ch cefnogaeth.

Yn gywir,

Gwynor Davies

Cyfarwyddwr Addysg a Gwasanaethau Cynhwysiant